



## 孤栖个遮仔

熱天愛走毋走、秋天愛來吉來个時節，天時異壞按算。天頂一團賁賁个烏雲，晡好日頭一下班，遽手就走出來，全無分大家發現。旋風一陣大雨，拚到大嫫牯聲，偈在車肚聽雨水拚拚滾搖吾車仔个聲，該兩點係無拳頭嫫恁大，怕乜比手指公有較粗大。偈無愛下車，較大个雨水乜奈偈毋何。

可惜，同人約好食飯个時間緊來緊兼線，還係認輸好叻。偈鑽去車後斗尋看有遮仔無？有哦，兩支新新个遮仔，正買著就分人擢在車肚，恬恬囤在脣頭。「烏白色个格仔，正經當老派，麼个國際性个設計、國際連鎖店賣个？就一般般啊，也好得有買啦，正六十九個銀，自動个，當值。」買時節个唸唸(ngiamˊ ngiam)，用佢時節心肝肚又唸加一遍。

打開一細縫仔車門，撇一下，遮仔就打開來叻，全全毋驚佢大嫫點个雨炸彈，真好。就可惜，大雨拚恁煞，遮面毋罅大，行到餐廳，褲腳還係溼忒一截。餐廳門口無好放遮仔个位所，也無好袋遮仔个塑膠絡仔，就摻遮仔拂燥水收好，先共下去化妝室。化妝室門口，等下愛共下坐桌个細妹朋友都先集合好叻，一陣人抓緊時間吹燥衫褲、整理妝容。

偈摻遮仔放在化妝室門口，新衝衝仔个裝潢、金黃色个電火下，吾遮仔看起來還係異派頭，一細扇仔壁分佢偎靠，斜斜仔憑好，等偈。「阿榮哥个餐廳，新裝潢哦，這便所乜拗蠻派頭。」「噢呵，雨落暢(tiongˋ)大咧，水跔等壁面溜下來哩。」「係乜，偈有擎遮仔，肩頭都還分佢潑溼忒！」「遽遽，好來去坐桌哩啲，偈兜有較慢叻。」你一句偈一句，大家見面總愛先譚哆幾句。

鹹菹圓、雞盤、糟嫫豬腳……，朋友餐廳个菜一品一品出，自家帶來个好酒一杯一杯啖，兩張桌大聲細聲个話語來來去去分人傍菜，外背个雨聲，早就恬叻。「唉唷，無雨叻。」「係啊，哪久恬忒个呢？」「駛車仔个人，還係愛細義。」煞棚叻，毋過，偈喫豬腳喫到手油油，愛來去洗手。

在化妝室門口，看著自家早就毋記得个遮仔，佢恬恬企在該位，等偈。餐廳个人走會淨叻，電火伸無幾多葩，灰黃个光線下，吾遮仔看起來，異孤栖。該孤栖企在門口望偈、等偈个身影，害偈想起吾姆：偈做偈在外背搞到懶、搞到暢，偈做偈硬性、發性、癲性，還會離家出走。吾姆總係無加講話、耐心个等偈，望偈自家知好轉想。毋使愁學費、毋使驚朽著、毋使掛吊無屋企身，吾姆像一支一撇就會自動打開來个遮仔，盡命牯摻偈遮風擋雨。偈守顧好遮仔，恁想：「孤栖个遮仔，還有一細扇仔壁好偎憑；孤栖个阿姆，偈敢有分您偎憑過？」

作者：彭瑞珠

### ☆詞彙學習☆

【兼線】giamˊ xien：接近。

【硬性】ngang xin：形容人脾氣硬，不易妥協。

【坐桌】coˊ zogˋ：入席就坐。

【癲性】dienˊ xin：形容人做事不依循常規。

【新衝衝仔】xinˊ cung cung eˋ：很新的。

【轉想】zonˋ xiongˋ：反省。

【葩】paˊ：盞，計算燈火的單位。